



UKA 2020/35
18/11-2020
Bo Martinsen

Inatsisartut aalajangiiffigisassaattut siunnersuutigineqarpoq, Naalakkersuisut peqquneqassasut pisortanit ikiorsiissutit pillugit allannguuteqaqqullugit, taamaalilluni namminerisamik illuutillit aammalu inissianik piginneqatigiillutik pigisallit pisinnaatitaaffigilissagaat pisortanit ikiorsiissutinik ikiorneqarsinnaangortillugit, kræfteqarlutik nappaateqarnertik ilutigalugu katsorsagassanngoraangamik naliginarmik akissarsionertik unikkallaraangat sulisinnaajunnarnertik pissutigalugu. Nalunaarusiami erseqqissarneqassaaq ajornartorsiut qanoq isikkoqarnersoq aammalu qanoq ikiortarialiuersut taamatut pisinnaatitaaffilissapata. Nalunaarusiaq EM2021-mi saqqummiunneqassaaq.

(Inatsisartunut ilaasortaq Erik Jensen, Siumut)
(Siullermeerneqarnera)

Qujanaq Siumup Inatsisartunut ilaasortaatitaanut Erik Jensen uuminnga siunnersuuteqarneranut.

Tamatta nappaammik eqqugaasinnaavugut, kalerreeqqaaranilu eqquisinnaalluni. Demokraatinut pingaartuuvoq, inuit napparsimasut nappaateqarnerminni aarlerissutissaqarnatik ikiorneqarsinnaassasut, soorlu assersuutigalugu ineqarnerminnut allanulluunniit akissaqarnissartik pillugu.

Ima napparsimatigilersimagaanni sulisinnaajunnaarluni taava sorpassuarnik ernumassuteqannginnissaaq uagut pingaartitaraarput. Uagut isumaqarpugut napparsimajunnaarnissamut nukiit atorneqarnissaat pingaarnerpaajusariaqartoq.

Taamaattumik Demokraatit isumaqarput, sivisuumik napparsimasut napparsimanermi nalaani pisariaqartitaminnik ikiorserneqarnissaannik qulakkeerinnittussamik pisortanit ikiorsiissutit pillugit aaqqissuusseqqinnermut ilanngussisoqarnissaa isumatusaarnerussasoq – aamma illunik piginnittuuppata piginneqatigiilluniluunniit illumi pigisaqarpata.

Taamaattorli isumaqanngilagut piffissamik atuingaatsiarluni nassuiaasiortoqartariaqartoq, taamaaliortoqassappat sivisuumik napparsimasut pisinnaatitaaffiisa qulakkeernissaannut kinguarsaataannaassammat. Akerlianilli silatusaarnertut isigaarput Naalakkersuisut allannguutissatut siunnersuutaata atulersinnissaa, taanna qulakkeerinnissammat, naliginnaasumik isertitat sivisuumik napparsimaneq peqqutigalugu annaaneqarpata pisortanit ikiorsiissutip aaqqissuuteqqinneranut ilanngunneqarsimassammata, tamanna FM 2021 piareertussatut naatsorsuutigineqarpoq.



Demokraatit manna iluatsillugu Naalackersuisunut ima apeqquteqarusupput: Sivisuumik napparsimasunut taakkununngaannaq tunngasumik ersarissumillu ikiorsiissutaasinnaasut aallartissallugit qanoq eqqarsaateqarpa, illuutilinnullu aammalu piginneqatigiilluni illuutilinnut suliniutit taakku ikiorsiissutaassappat?

Paasinnilluta Naalackersuisut allannguutissatut siunnersuutaat Ilaqutariinnermut- Peqqissutsimullu ataatsimiititaliamut suliareqqitassanngorlugu innersuupparput.